

SANTIAGO, APOSTOLUA

Bilboko Gotzain-aulkiko Zaindaria

Sarrera-oharra

Egun on, senideok. Aurrez-aurre jarriko ete doguz, ba, Compostelako Santiago eta Loiolako Ignazio, ha galiziarrena dala esanez, eta gurea Ignazio dala?

Erlijioerietan bagabilz, Jesusen jarraitzaile izatea zer dan ulertu ez dogulako da. Apostoluei ere gatz egin jaken, etekinen bila ebizelako. Baina bai ulertu ebela Jesus ezagutzera emotean euren bizitza arriskuan jarteraino.

Izan daiguzala apostoluak eredu, eta indartu daiala Santiagok gure sinismen motela.

Sarrera-abestia

BIHOTZ BATEZ ALKARTURIK

Zugana gatoz, Jauna; Zugana gatoz, Jauna.

Emoiguzu zure argi, grazi ta maitasuna:

entzun, arren, Jauna.



I. Irakurgaia (Eg 4, 33; 5, 12. 27-33; 12, 2)

Ez ziran eskolatuak, ez jakintsuak; baina bai ulertu ebela Jesusen inguruan euren zeregina zein zan, eta zer aukeratu eben. Izan daiguzan eredu.

Herodes erregeak ezpataz hilarazo eban Santiago.

Apostoluen Eginak liburutik

Egun hareetan, Apostoluek aginpide handiz egiten eben Jesus Jaunaren biztueraren autormena, eta jenteak oso estimatuak ebazan guztiak. Mirari eta egintza harrigarri asko jazotzen zan herrian apostoluen eskuz.

Batzar Nagusiaren aurrera ekarri ebezan apostoluak, eta abade nagusiak esan eutsen: «Ez geuntsuen zorrotz agindu ez irakasteko Jesusen izenean? Zuek, barriz, Jerusalem osoa bete dozue zeuen irakaspenez;

gainera, gizon horren heriotzaren erantzukizuna geuri leporatu nahi deuskuzue».

Pedrok eta beste apostoluek erantzun eben: «Jainkoaren esana egin behar da lehenengo, ez gizakiena. Gure asaben Jainkoak biztu egin dau zuek egur batetik dingilizka hil zenduen Jesus. Jainkoak goratu egin dau bere eskumaz, Buruzagi eta Salbatzaile eginez, Israeli bihotz-barritzea eta pekatuen parkamena emoteko. Geu gara gauza honeen testigu, geu eta esaneko jakozanei Jainkoak emoten deuten Espiritu Santua».

Erantzun honek euren onetik atara ebazan batzarkideak, eta hil egin nahi ebezan apostoluak. Eta Herodes erregeak ezpataz hilarazo eban Joanen anaia Santiago.

Jaunak esana.

Erantzun-salmoa (Sal 67 [66], 2-3. 5. 7-8 (R/. 4))

Izadi osoagaz eta herrialde guztiekaz bat egiten dau salmogileak Jainkoaren goralpenetan. Egin daigun beragaz bat geuk ere Jainkoa gorestek.

**R/. Ene Jainko: ospatu zagiezala herriek
ospatu zagiezala herri guztiek.**

II. Irakurgaia (2 Ko 4, 7-15)

Lagundu deigula irakurgai honek gure sinismena aintzat hartzen, zaintzen eta garatzen; ez egun baten izan geiken saria itxaroteko, eguneroko bizitzarako baino.

Jesusen heriotza daroagu geugan.

San Paulo Apostoluak Korintoarrei egindako bigarren epistolatik

Senideok: Altxor baliotsu hau buztinezko ontzian daroagu, argi agertu dadin honenbesteko indarra Jainkoagandik datorrela, eta ez gugandik. Alde guztietatik estutzen gaitue, baina zapaltzen ez; larri

gagoz, baina ustea galduta ez; erasopean bai, baina eskutik itzita ez; lurrera botatzen gaitue, baina hondatzen ez; edonon eta beti Jesusen heriotza daroagu geugan, Jesusen bizia be gugan agertu dadin. Holan, gugan heriotzak dihardu lanean; zuengan, barriz, biziak.

Bizi garan bitartean, beti heriotzara garoez Jesusegaitik, gure izate hilkor honetan Jesusen bizia be agertu dadin.

Hau dino Liburu Santuak: «Sinistu neban, eta horregaitik hitz egin neban». Guk be, sinismen-espíritu bera dogula, sinisten dogu eta horregaitik hitz egiten dogu, jakinik, Jesus Jauna biztu dauanak biztuko gaituala geu be Jesusegaz, eta haren ondoan ipiniko gaituala zuekin batera. Hau guztia zuen onerako da, Jainkoaren dohaia askorengana zabaltzean, esker ona be ugaritu dadin, Jainkoaren aintzarako.

Jaunak esana.

Ebanjelioa (Mt 20, 20-28)

Ibili geintekenez Jesusen inguruan etekinak eskuratzearren. Jaunak aurpegira botako deusku hori, eta bide zuzena erakutsiko: zerbitzea. Egin deiogun harrera on Aleluia abestuz, zutunik.

Nire kalizatik, bai, edango dozue.

✠ Jesu Kristoren Ebanjelioa San Mateoren liburutik

Aldi haretan, zebedeotarren ama hurreratu jakon Jesusi bere semeakaz eta aurrean ahuspeztu, eskari bat egiteko. Jesusek itaundu eutson: «Zer gura dozu?» Eta harek: «Agindu egizu nire seme bi honeek, jesarri daitezala zure erreinuan bata zure eskuman eta bestea zure ezkerrean».

Eta Jesusek: «Ez dakizue zer eskatzen dozuen. Gauza ete zarie Nik edan behar dodan kalizatik edateko?» Erantzun eutsoen: «Bai, gauza gara!» Jesusek orduan: «Nire kalizatik edan, bai, edango

dozue; baina nire ezker-eskuman jesartze hori, ez dago nire esku inori emotea; nire Aitak norentzat prestatua dauan, hari emongo jako».

Beste hamarrak, hori entzutean, hasarretu-hasarretu egin ziran anaia biakaz. Baina Jesusek dei egin eta esan eutsen: «Badakizue herrietako agintariek menpean hartzen dituela herriak, eta handikiek euren agintea ezartzen deusiela. Ez bedi izan holan zuen artean; ezpada ze, zuen artean handi izan gura dauana izan bedi zuen zerbitzari, eta zuen artean lehenengo izan gura dauana izan daitela zuen morroi. Ze, Gizonaren Semea be ez da etorri zerbidua izatera, zerbitzari izatera baino, eta bere bizia askoren ordainsari emotera».

Jaunak esana.

ESKARIAK

† Jainkoaren hitz salbagarri eta su-emoiletik sortu daitezala gure eskariak, uste osoa Jainkoagan jarrita:

- Eleizearen alde: bai bere artzainengan, eta baita bere seme-alaba guztiengan ere, gero ta argiago erakutsi daian sinismenaren ondasuna, *eskatzen deusugu, Jauna*.
- Sufritzen dagozan herrialdeen alde: gorrotoak erre ez daizan, eta herrialde aberatsen laguntza ta zorren parkamena lortu daiezan, *eskatzen deusugu, Jauna*.
- Sinismena ospatzeko abaderik ez dauken eleiz alkarteen alde: eleiz alkarte izateaz jabetu daitezcan, eta alkartzea bilatu daian, *eskatzen deusugu, Jauna*.
- Santiagoren omenez alkartu garanon alde: Jaunaren jarraitzaile eta haren barri-emoile gartsu izatea bilatu daigun, atxaki, bildur eta lotsa guztien gainetik, *eskatzen deusugu, Jauna*.

† Gure otoitzak Jesus Jaunak irakatsitakoan indar hartu daian, esan daigun gogotsu, Jesusek berak irakatsitako otoitza:

Azkenenerako

Santiagoren garrak ikutu bagaitu, Jesusen jarraitzaile eta testigu sutsu urtengo dogu.

Gurea ez da inor menperatzea eta gaitzestea (kondenatzea), danen zerbitzari izatea baino, batez ere beharrizanean diranena. Hauxe da, Jesusen ustez, gizakiak egin daiken gauzarik ederrena.

Azkenenerako

**ALKARTUTA GOAZEN AURRERA KANTARI,
BIHOTZAK ZABALDUZ BETIKO POZARI (bir).**

*Maitasun ta zuzentasunez dezagun
lortu anaien askatasun,
Badator-eta Jaunaren betiko egun.
Hor dugu distiratsu egunsentiko argitasun.*